



facebook.com/Stedtlischiisser

# STEDTLISCHIISER 2015

ШТЕТЛИШИИССЕР

## RUSSISCHES U-BOOT IN AARE ENTDECKT

Moskau: Zmits ir Nacht, me gseht s diffus:  
Es U-Boot taucht zur Aare us  
Grad bim Chrumme Durm.  
Moskau: Müslistill goht d Luke uf  
Dunkli Gstalte, ghörsch ke Schnuf,  
Setze aa zum Sturm


Kosake hopp hopp us de Kabine  
Matrose hey hey hey sit bereit!  
Nach dr Krim und dr Oscht-Ukraine  
Wird jetz d Vorstadt als Nöchschtli befreit!

Putin, Putin  
D Vorstadt het um Hilf agfrot  
Si wärde schints wie Sklave plogt  
Und das hei si satt  
Putin, Putin  
Wladimir, Du grosse, treue  
Chönntscht nid d Vorstadt cho befreie  
Vo der schlimme Stadt

Moskau, Moskau  
Rot si die scho lang, hesch gseh  
Roti Liechter, Cabaret  
Ja ja ja ja ja  
Moskau, Moskau  
Dr Bohnebluescht het wider off  
Statt Lego gits Kalaschnikoff  
Ra ta ta ta ta

Moskau, Moskau  
Dr Fluri het telefoniert:  
Wladi, los, ganz ungeniert:  
Dasch super für d Region!  
Moskau, Moskau  
Vo Petersburg bis Gosslwil  
Vo Zuchu bis uf Tschernobyl:  
Das isch mi Fusion! Hey!

*Melodie: Dschingis Khan, Moskau*



## ZUGER-MADL

Ja, ja, so blau, blau, blau isch me am Zugersee.  
Blau isch s Parlamänt. Blau dr Presidänt.  
Är het die grünen, grünen, grünen, grüne Auge gseh,  
Und denn – isch s-um ne gscheh!  
I dr erschte Hütte hei si bim Wyse sich troffe.  
I dr zwöite Hütte hei si Rote gsoffe.  
I dr dritte Hütte het är sie denn küsst.  
«Keiner weiss was dann geschehen ist!»  
Ja, ja, so blau, blau, blau isch me am Zugersee.  
Blau isch s Parlamänt. Blau dr Presidänt.  
Sie het die ro, ro, ro, roti Nase gseh cho,  
Und de- e- e- e- nn – isch si K.O.

*Melodie: Heino, Blau blüht der Enzian*



## CARNA GRISCHA

Carna Grischa da la mama: Bisch du Güggel? Bisch du Chatz?  
Nach Migrodata bisch es Lama. Wurscht! S isch Fleisch! Friss. Halt dr Latz.  
Buna Not, dorma bain! Es isch doch fein! Villicht isch s Schwein.  
Buna Not, dorma bain! Jo, wenn s chasch bhalte, denn hesch Schwein!

*Melodie: Engadiner Volksweise,  
Chara Lingua da la Mamma / Dorma bain*



## ÜSE SCHWARZ

Husch! Mir haue ab. Dört vorn' isch d Polizei!  
Sit Tage immer nur die blödi Flüchtere! Oje. Oje.  
Worum hei mir au müesse uf Missouri go?  
Für Schnitzelbänk go z probe, hätt s au Uri to. Ojo. Ojo.  
Jetzt isch z spot: Do z St. Louis  
Isch me zue n isch grob und fles  
Wenn mir so ne Cop gseh cho,  
Düüse mir drvo!  
Atemlos, und ganz liis,  
Klappe zue und schmink di wiiss!  
Atemlos, ohni Ton  
Seckle mir dur Ferguson.  
Atemlos, und keis Gschnorr!  
Überall droht Lääbensföhr!  
Atemlos, über Stock und Stei...  
Und alls, will mir e Schwarze bi n is hei!

*Melodie: Helene Fischer, Atemlos*



# SONDERZUG UF KONSTANZ

Pack d Täsche ii! Mir näh dr Sonderzug uf Konstanz!  
Dört isch alls halb so tüür. Schmeiss dini Pro-Bon is Futür!  
Mir chaufe ii! Mir näh dr Sonderzug uf Konstanz!  
Uf e Franke! Proscht! – Jetzt wird gspart, gliich was s choscht!  
Miniröckli, Chalbfleisch, Pampers, Halbschueh und Seife,  
Chatzefueter, Wattestäbli, Riis, Autoreife:  
Dank em Thomas Jordan chaufsch äne am Jordan,  
Profittersch eso und machsch no d Schwobe froh.  
Peperoni, Hundebiscuit, Wiissbier und Eier,  
Tiefchüelpizza, Läberwurst – jo, grüessech Frau Meier,  
Ah, dir sit hüt au do. I bi mit mir Frau do:  
Ig und s Ruth, mir mache hüt chli s Gwärb kaputt (hihi).

Konstanz!... Waldshuet!... Singen!... Lörrach!  
Kleinbasel... *dasch dank ir Schwiz! Jäso!...*

Hueber, Heutschi, Ochsebei si alli scho lang do,  
Lueg dört isch d Frau Hugetobler – he du do! Gang do  
wäg, das isch mi Schinke! Furt! Süsch chasch hei hünke!  
Gib die Schwinswurst frei, süsch git s e Schlegerei.  
D Verchäufnerin stöhne: „Nai des isch zum verrecke!  
Humaner als die Schweizer wär e Horde Heuschrecke!  
Dank mim Chleiderbügel bezieh die sofort Prügel.  
Denn stürz i mi i Kampf ums letschte Hüenerbei.

Pack d Täsche ii! Mir hei für 5, 6 Wuche poschtet!  
Gäll mir si smart, läck hei mir gschpart!  
Schön isch derbi: Will das jo alls so wenig gchoschtet het,  
Hei mir jetzt dopplet so vil und dr Räscht goht uf e Müll  
Jo mir hei dopplet so vil und dr Räscht goht uf e Müll!



*Melodie: Udo Lindenberg, Sonderzug nach Pankow*

## SIS DING

Hocksch unten-ohne im Büro  
und machsch di Fründin froh.  
Das geit ganz ring – he dank mit dim Ding.  
Dini Fründin isch zwar gar nid do  
Aber trotzdem cha si cho:  
Das geit ganz ring – he dank dank dim Ding.  
Für das git s hüt es Telefon, das het jo nid nur Ton  
Für dass s es bring. Nid nur Klingeling.  
Du machsch ganz stolz es Föteli vo Willy, Sack und Zötteli.  
Doch jetzt isch do – es Risiko:  
Si het dis Ding im Handy. Dä Tschätt het se beglückt!  
Si het dis Ding im Handy. Au d Press isch ganz entzückt!  
Du bisch zwar nid senil. Nei Du bisch sehr viril:  
Super hert im Ding. Aber chli weich im Gring!

Jetzt hocksch ganz elleini im Büro.  
Ganz Bade isch nid froh.  
Will s Marketing liidet wäg dim Ding.  
Jetzt bruucht s e nöii Gspröchs-Kultur,  
E Image-Korrektur:  
Greis bis Ching all zieh am gliiche String.  
Mir empfähle ne Kampanie vo Kiew bis Spanie  
Es New-Branding, mit Bezug zum Ding.  
S Leitbild derzue isch konstruktiv:  
Es lutet klar und proaktiv:  
Rite rite Rössli  
Z Bade stoht es Schlössli  
Z Bade pflegt me Transparenz  
Mit em Amme sir Potänz!

*Melodie: Annett Louisan, Dein Ding*



STEDTLISCHIISSER  
2015



## ZÜCK MOL DIS HANDY

Zück s Handy, chumm mir mache schnäll no eis, schnäll no eis  
Zück s Handy, nei e so eis git s no keis git s no keis  
Zück s Handy, weisch e so eis, das git Mais, das git Mais  
Zück s Handy, chumm mir mache schnäll no eis, schnäll no eis.

Los, chumm, jetz zück mol dis Handy, mir mache no schnäll es Selfie  
Dasch geil, das gseht denn im Netz nämlech jede vo Hongkong bis Delphi  
S isch cool, dass alls us mim Läbe jetz sofort uf Facebook erfahrungsch!  
Drum knips! S isch wurscht öb mis Gsicht uf däm Bildli isch oder mi... Fuess.

Du gsehsch dr Scheidegger vo Gränche mit me chline Stückli Pischte  
Und dr Schache bir Eröffnig. Geil! D Regierig i dr Chischte!  
D Benedikta vo r Vereneschlucht gsehsch grinse näb ere Tanne  
Das funktioniert: Eso verschüücht si alli böse Manne.  
Du gsehsch d Kambundschi seckle, nume leider ohni Stab.  
Dä het drfür dr Batscheler – sis Hüehnli freut sech drab.  
Du gsehsch e Dschihadischt mit Bart – ir Pose vom ne Hänker  
Mit eme Paar Schueh (?) Nei, sorry, dasch dr Schänker!


Los, chumm, jetz zück mol dis Handy, mir mache no schnäll es Selfie  
Dasch geil, das gseht denn im Netz nämlech jede vo Hongkong bis Delphi

Du gsehsch es Von-Roll-Hus wo brönnt. Jetz cha me dört nümme wohne.  
Dä Brandstifter het s nid kapiert: Dä hätt müesse i d Chrono!  
Du gsehsch dr Michi Blüdelli mit China-Plalinée  
Nur s Kurhus das gsehsch nid, dasch zue, dört hetz drum jetz chli Schnee.  
D PEGIDA-Führieg gseht me nümme, die isch bereits chli lahm,  
Drfür gsehsch Du dr Dölfi Hitler uf em Kafrahm.  
Du gsehsch dr Jenni vom Bieltor-Kiosk mit es paar Plaggettli  
Und dr Walter Wobmann mit me Gummi-Minarettli

Los, chumm, jetz zück mol dis Handy, mir mache no schnäll es Selfie  
Dasch geil, das gseht denn im Netz nämlech jede vo Hongkong bis Delphi  
Mir stöh ganz nööch zu däm Abgrund – so cool – wie nes unirdischs Wäse  
Nur no nes Schrittl... wäääh! ... bumm! ... Gang hol Schüfeli und Bäse!

*Melodie: Meghan Trainor, All about that bass*

## VIEL GÄLD



Ir achte Klass isch s Thema: Wele Bruef bringt ganz vil Gäld.  
Dr Raffi, dä wird Bänker, denn sig är dr Rickscht vor Wält.  
Ig überchume vil me Gäld! Rüeft Max – Du chunsch nid drus.  
Ig wirde dank Bankräuber und de raub i di de us!  
Alls Quatsch, rüeft do dr Tim, Ig weiss vil besser wie me s miech:  
Ig hole bi dr Bank Kredit – und nächhär wird i Griech!

*Melodie: Mani Matter, Wecker*